

tansa predita, e posta per li X savii al cargo che *de jure* potrà portar, *ut in parte*; e fu presa: 23 di no, 161 de si.

Fu posto, per li diti, che sier Sebastian Malipiero qu. sier Matio e sier Andrea suo fradello cargi de fioli, debitori di decime et mezi fiti di lire 35 di grossi , et debitori di la Signoria nostra, che 'l dito suo debito sia suspeso per anni do, *ut in parte*; et fu presa. Ave 21 di no, 144 de si etc.

Fu posto, per li savii, atento che a Chioza sia stà trovà certo contrabando di piper lire 2000 per valuta di ducati , ch'è di alcuni merchadanti milanesi, che li diti prestì a la Signoria nostra ducati 700 da esser scontadi, *ut in parte*; e di uno Zuan da la Costa di Mantoa, et sia asolto di contrabando pagando li ufficiali e daci. Fu presa.

Fu posto, per li diti, una parte di X savii, che atento l' incendio tutti si vadino a dar in nota el stabele e possession hanno, e meterlo in loro nome in termine di mexi tre soto pena, *ut in parte*; et le caxe brusade et ruinade li patroni posano andar a li X savii prediti e sfalcarle etc. di le decime; la qual parte è molto longa, *ut in ea*. Et fu presa.

Fu posto, per li diti, una parte di Naldi di Brisigella, quali in questa guera hanno servito la Signoria nostra capi di fantarie, e sono per servir; che a Babon di Naldo, capo di fanti 400 brisigelli, qual à conduto de qui la dona e fioli ad habitar e vol continuar a servir la Signoria nostra, sicome fe' il magnifico domino Dionisio di Naldo suo barba, per tanto li sia confirmà la provision di ducati 60 per paga. *Item*, a Zuan di Naldo suo fratello, l'habi ducati 30 per paga, et fu presa.

Di Crema, fo letere di sier Bartolomio Constarini capitano e provedador. Come è gran carestia de vin, et si beve acqua in la terra, perchè il vin è pocho e val assai. Il morbo vi è grande. Si dice il signor Prospero Colona col campo dil Ducha vol venir acamparsi soto la terra, e s' il vien soto, lo romperà, sicome l' à roto aitre fiате. *Item*, si provedi di danari etc.

119* Fu posto, per li consieri e savii, una letera a l' orator nostro in corte per sier Lodovico Michiel qu. sier Piero da San Polo, qual per esser molti fradelli e non hanno il modo di viver, che li sia provisto di beneficii sul nostro per ducati 500, *ut in parte*. Fu presa.

Fu posto, per li savii di terra ferma, una parte di uno, qual è nominato Nicolò da Corfù, qual era patron di una barbota soto Maran e fo morto, che

a uno fiol suo li sia dà la expetativa di fante al primo officio vachante: 114 di si, et fu presa.

Fu posto, per li savii, una provision a uno ciprioto ducati 60 in Cypri, nome Udeth Bibi cavalier, *videlicet* vachante: 13 di no, 81 de si; fo presa.

Fu posto, per li savii, la parte di 5 per 100 di le Intrade, come ho scripto; et perchè sier Marin Zorzi dottor volse contradirla, fo rimessa a un altro Consejo; *tamen* la si meterà.

Fu posto, per li savii, la expedition di domino Mercurio Bua, *videlicet* che l' habi e fazi altri cavali 150, et habi per la sua persona ducati 70 per paga. Sier Christofal Moro savio dil Consejo volse la parte, con questo, Andrea Mauresi *etiam* capo di stratoti di l' altra factione, che fazi cavali 100 , *ut in parte*. Andò suso sier Lunardo Mozenigo savio dil Consejo per contradir, et perchè l' ora era tarda, fo rimessa a uno altro Consejo.

Fu posto, prima per i savii, excepto sier Antonio Condolmer savio a terra ferma, una gratia di sier Piero da Canal qu. sier Nicolò dottor, condutor dil dazio dil ferro dil 1513 e caratadori, che sier Lorenzo Falier qu. sier Tomà e fratelli, sier Lorenzo e sier Silvestro Minio qu. sier Andrea e alcuni altri, quali è debitori dil dito dazio di ducati 1250, per tanto voleno pagar ditti danari di Camerlengi in anni tre et voleno prestar a la Signoria ducati 1000 da esser scontadi in le angarie soe e di altri, *videlicet* ducati 100 per volta, *ut in parte*. Contradise sier Antonio Condolmer, dicendo non era di far. Andò in renga sier Alvise da Molin savio dil Consejo, dicendo il bisogno si ha di danari etc. Andò le parte, et fu presa di largo; 48 di no, 128 de si.

Fu posto, per i consieri, dar il possesso di uno beneficio in visentina, chiamato Santa Maria e Juliana di la Villa dil Conte, a domino Lodovico di San Bonifazio camerier dil Pontifice, *ut in parte*; el qual beneficio par l' avesse sier Polo Morexini qu. sier Marco per uno sno per via dil vescovo di Vizenza con letere di la Signoria; *tamen* hora è stà dato a questo, che à 'uto le bolle dil Papa etc. Et fu presa.

Di Padoa, fo letere, di eri. Come il capitano mandò certi fanti a la volta di Este, e altre occorenzie di danari; nulla da conto.

1514, die 23 Maj, in Rogatis.

120

Essendo brusate tutte le scritture di l' ofizio di Diexe savii sora le decime, el qual è de l' importanza ben nota a questo Consejo, se die trovar via et